

Nunat Avannarliit Killiit Siunnersuisoqatigiiffiata Savalimmiuni naalakkersuisunut, Kalaallit Nunaanni Naalakkersuinut aamma Islandimi Naalakkersuinut kaammattuutigaat, suleqatigiillutik suliamut attuumassutilimmik inuttaqartumik ataatsimoorluni nunani avannarlerni killerni nuusianik, ileqqorsuutinik erinarsuutinillu katiterisussamik suleqatigiissitamik pilersitsissasut. Aammattaaq nunani taakkunani pingasuni saqqummiussinermi aningaasartuutit suleqatigiinnit qulaajarneqassapput.
(Aallartitanut siulittaasoq Vivian Motzfeldt)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Siullermeerneqarnera

Naalakkersuisut Nunat Avannarliit Killiit Siunnersuisoqatigiivisa isumaqatigiissutaannut nr. 1/2017-mut Inatsisartut isumaqataanissaannut siunnersuummut qujapput, tassalu nunat avannarliit pingasut naalakkersuisui suleqatigiissitamik inunnik sulianut ilisimasalinnik inuttalimmik pilersitsinissaq pillugu suliniuteqalissasut, taakkulu nunani avannarlerni ileqqorsuutinik erinarsuutinillu nuusersukkanik ataatsimoorlutik katiterissapput.

Nunatsinni erinarsornermut ileqqunik ulikkaarpugut, arlaannillu pisoqartillugu erinarsorneq nuannarisuuarput. Aamma nunanik avannarlernik sanilerisatsinnik naapitsisarnerni tamanna atuuppoq. Naalakkersuisut ileqqorsuutit erinarsuutillu nunat pingasuusut akornanni ataqatigiinnermik nukittorsaassasut isumaqatigaat. Taamatuttaaq nunani avannarlerni atitunerusumik ataatsimut ilisimasaqarnerput qulakkeerneqassaaq.

Naalakkersuisut maluginiarpaat isumaqatigiissut nunat pingasuusut akornanni ataqatigiissaarilluni sulinissamik kinguneqarumaartoq. Aamma Nunat Avannarliit Killiit Siunnersuisoqatigiivisa allattoqarfiat katersanik suleqatigiissitap aallaavigisinnaasaannik peqareerpoq.

Tamatuma saniatigut Nunat Avannarliit Killiit Siunnersuisoqatigiivisa isumaqatigiissusiaminni aningaasat suminngaanniit aaneqassanersut isummorsorfigisimannigikkaat Naalakkersuisut maluginiarpaat, matumani nunani avannarlerni nunat pingasuusut suleqatigiissitamik pilersitsinissamik sulissuteqalissagaluarpata. Suleqatigiissitamut allattoqarfeqartariaqarnissaa, suleqatigiissitami ilaasortat aningaasarsiaqartinnissaat aamma suleqatigiissitap ilaasortaannik allanik qarasaasiakkut takkullutilluunniit ataatsimiititsisarnissanut aningaasanik immikkoortitsinissaq kiisalu suliaq naammassippat suliarinissaa, naqitertinnissaa saqqummersinnissaalu pisariaqalersinnaasut Naalakkersuisut nalilerpaat.

Covid-19-ip kingunerisaanik Nunatta Karsiata naatsorsuutigisatut amigartoorinnaanera pissutigalugu Naalakkersuisut innersuussipput suliap naammassinnaanut aningaasaliisoqarnissaa periarfissaalerpat pissasoq.

Naalakkersuisut taamatut oqaaseqarlutik siunnersuutip akuersissutigineqarnissaa inassutigaaq.